

[Janv. 1977]

EDITIONS FEDEROP
II, rue Ferrachat, 69005 Lyon

Las edicions Fédérop venon de publicar, en colabòracion amb lo Sector scientific de l'Institut d'Estudis Occitans,

MARXISTAS E NACIONS EN LUCHA

un libre de 300 paginas, fruch del trabalh de la tresena Universitat Occitana d'Estiu.

Vaquí çò que i trobarètz:

- Introduccion, per Ivon Bordet, que causiguèt e recampèt los tèxtes;
- L'austromarxisme e la question nacionala: tèxtes d'Otto Bauer;
- Marxisme e combat gaèlic: tèxtes de Connolly e Mac Lean;
- Mariátegui e lo problèma indian;
- Gramsci e la question nacionala;
- Las posicions d'Andreu Nin.

Los tèxtes son totes acompanyats de presentacions signadas per Bordet, Person, Paris e Joana; totes foguèron revirats directament de la lenga originala a l'occitan (lemosin, lengadocian e provençal); la màger part d'aquestes tèxtes an pas jamai estats revirats en francés.

Atal presenta lo Lafont MARXISTAS E NACIONS EN LUCHA: "Dins las entremièjas concrètas del despertar de las entitats nacionalas, tant en Euròpa coma en America, los marxistas aguèron de tornar suls ensenhaments dels mèstres Marx e Engels e de donar un contengut clar e precís a la ligason benlèu teoricament malaisida, mas practicament plan vesedaira de la lucha de classa e de la lucha nacionalitària. Al moment que sèm, qu'aquela ligason degun la saupriá pas negar, èra important de publicar los tèxtes mai consequents sul sicut. E mai de o far en occitan, per assenhalhar, coma o a volgut lo director del libre, Ivon Bordet, la madurason istorica d'aquela lenga intellectualament renaissenta dins totas las sèus formas regionalas."

Sus aquel obratge, que val 40 francs, se ne comandatz al mens 3 exemplaris, las edicions Fédérop vos faràn una remesa de 15%. La meteissa remesa vos serà facha sus

Julio Caro Baroja, LE MYTHE DU CARACTERE NATIONAL, paregut el tanben dins la coleccion "Minorités nationales" (es de legir la critica que ne fa Felip Gardy dins la revista DIRE, n°3, auton de 1976) e que còsta 20 francs.

Coralament vòstre

Bernat Lesfargas